



D'vins vos grands oûy.

Comèdèye d' in-ake po lès
èfants.

Lemaître Jeannine
Seigneurie Michel-Ange
route de Beaufays 122

Ninane-Chaudfontaine
 GSM 0495-302928
 Sabam 00134823582

Pèsonèdjes 3 valèts : Denis – Mikaël – Renôd
 4 bâcèles : Angélique – Gwendoline – Ludivine - Marika
 1 feume : Madame Granri, li mame da Simon

Décôr 1 (a voste idèye)

Sinne 1. Li mame – Gwendoline – Marika

Li plèce èst vûde. On sone a l'ouhe d'intrèye. Mme Granri vint drovi.

Li mame Bondjoû Gwendoline ! Bondjou Marika ! Intrez.

Gwendoline Bondjoû Madame Granri ! (tot s'tournant vès si p'tite soûr)Dihez bondjoû Marika.

MarikaBondjoû Madame.

Li mame Tins, vos-av' pris vosse pitite soûr avou vos ?

Gwendoline Awè...Dji deû i r'loukî ! mi mame è-st-èvôye fé dès coûsses !

Li mame C'èst djinti çoula !

Gwendoline C'èst bin pâcequ'i fât bin savez Madame Granri, ca Marika è-st-ine bèle èplâsse !

Li mame C'èst dès-idèyes édon çoula ! Kimint ine si nozèye pitite bâcèle sèreût-èle soyante ?

Gwendoline On veût bin qui v' n'èl kinohez nin !

Li mame Denis m'a dit di v'fé rouwârdèr chal. Volez-v' beûre ine saqwè tot l'ratindant ?
Coca ? Jus d'oranche ? cécéémèl ?

Gwendoline Dji vou bin on coca !

Li mame Et vos Marika ?

Marika Vos n'âriz-nin dè chôcolât téléfèye ? dè chôcolât avou dèss grossès neûhètes
divins ?

Gwendoline Marika ! - Ni fez nin astème a lèye Madame Granri ! C'è-st-ine pitite
èfrontèye !

Li mame (tot riyant) dè mons, èle sét çou qu'èle vout ! I m'sonle qui m'ènnè d'meûne !
ine tâblète è l'ârmâ dèl couhène ! Dji-v' zèl ca cwèrî !

(Mme Granri mousse foû).

Sinne 2. Gwendoline - Marika

Gwendoline Dji so djinnèye Marika ! Vos n'vinrez djamây pus avou mi nol pâ !
(a pârt) ... Po 'ne fèye qui Denis m'a d'né radjoû , i fât qu' dji prinde mi p'tite
soûr avou mi !!!

Marika Dj'a oyou çou qu'vos-av' dit ! sèpez-v' bin qwè ?. vos m'dinrez deûs-eûros èt
dji sèrè come lès treûs mårticots !

Gwendoline Lès treûs mårticots ?

Marika Awè !...lès cis qui vèyèt tot , qu'oyèt tot mins qu'i d'monèt boke cosowe ! I
n'dihèt mây rin !

Gwendoline Qui pôriz-v' vèyî don ? n'a rin a vèyî ! èt qui pôriz-v' dîre al copète dè
martchi ? N'a rin a dîre !

Marika Qui vos d'hez ! Siya i-n-a-st-a vèyî !

Gwendoline Dji m'dimande bin qwè !

Marika Dji n'so nin bwègne d'in-oûy èt aveûle di l'ôte parèt mi èt di pus' mès-oûy sont-st-al bone plèce ,nin podrî m'hanète ! Dji veû tot ! dji n'lèye rin hiper !

Gwendoline O çoula, po-z-èsse curieûse, vos n'estez qui d'trop' ! mins, qu'av' vèyou èt qui veûrez-v' à djusse ?

Marika Dj'a dèdja vèyou èt dji veûrè co.

Gwendoline Qui veûrez-v' don glawène ?

Marika Dji veûrè qwand Denis v' rabrèss'rè è catchète !

Gwendoline Mi rabrèssî ? Denis n'mi rabrèss'rè nin ! V's n'estez qu'ine pitite sote !...

(On sone a l'ouhe d'intrèye – Mme Granri arivéve tot djustumint avou l'coca èt l'chocolât)

Sinne 3. Li mame – Gwendoline – Marika

Li mame Tinez vola vosse coca...tinez Marika vosse rôye di chocolât !

Gwendoline Mèrci Madame Granri.

Marika Mèrci Madame !

Sinne 4. Li mame – Gwendoline – Marika – Ludivine – Angélique - Mikaël - Renôd

Li mame Intrez lès-èfants...alez-v's-achîr ad'lé Gwendoline èt Marika !

Ludivine Bondjoû Madame !

Angélique Bondjoû Madame.

Renôd Bondjoû Madame

Mikaël Bondjoû Madame !

Li mame Denis v'rouwârdéve...il a dèdja aponti lès tchèyîres...alez v's-achir !Volez-v'
beûre ine saqwè tot l'ratindant ? Coca ? Jus d'oranje ? Cécémèl ?

Angélique On cécémèl por mi s'i-v' plèt bin !

Ludivine Mi ossu Madame Granri !

Renôd Mi dj'inme mîs on coca !

Mikaël Mi parèyemint Madame !

Li mame Dji-v' va cwèrî li k'mande.

(Ele mousse foû).

Sinne 5. Gwendoline – Marika – Angélique – Ludivine – Renôd - Mikaël

Renôd Qué rapoulèdje qu'i-n-a chal !

Mikaël N's-èstans ine fâmeûse clique !

Angélique Pormi il a-st-invité tote li scole !!

Ludivine Estez-v' â corant di çou qu'i s'passe ?

Gwendoline Poqwè nos-a-t-i houki ?

Renôd Po m'pârt, dji n'sé nin !

Mikaël Mi non pus !

Angélique I m'a dit qu'i faléve a-b-s-o-l-u-m-i-n-t èsse chal oûy !..èt vos m'chal !

Ludivine Mi ossu !

Gwendoline Mi avou !

Renôd Mi, i m'a dit qu'c'èsteût èk'cèptionèl !...ine saqwè come on n'a djamây vèyou !

Mikaël Qui sèreût-ce bin ?

MarikaMi dji sé çou qu'c'est, na na na !

Angélique Kimint l'sâriz-v' don vos , bout d'tchique qui v's-èstèz ?

Ludivine Ci n'est sûr nin a 'ne pitite tchipète come vos qui Denis dit sès s'crèts mawèt !

Gwendoline N'fez nin atinciyon ! èle vout co fé l' malène ! Fât tofér qu'èle hare si nez wice qu'in-ôte ni mètreût nin s'cou !

MarikaI n'm'a rin dit...mins dji sé...

MikaëlTèhiz-v' sot'trèye !

Angélique On n'sét djamây...i s'pout qu'èle sét qwè èt quèsse !

MarikaDinez-m' chaskonke on d'mèye euro èt dji-v' dirè l'cwacwa !

Renôd Mi dji n'pâye nin po dès bièstrèyes !

Ludivine Dj'vôreû tot l'minme bin k'nohe li pona èt l'cova ! Tinez Marika vola lès 50 cents !

Angélique Mi ossu ! Dji broûle di curiozité ! Tinez vola m'payèle!
Alè djans Renôd èt Mikaël, dinez-lî ossu vosse pàrt qu'on sèpe qwè !

Renôd Ça va d'akwérd ! Tinez !

Mikaël Vola mès dièrinnès biscûtes èvôye po l'diâle !..c'èsteût çou qui dimeunéve di m'brut' !

Gwendoline Asteûre qui vos-av' vos çances, dihez nos çou qu'c'est !

Ludivine Awè...abèye !!! Qu'èst-ce qui c'est ?

Marika(Tote fîre) C'èst po d'ner ine bâhe a totes lès bâcèles qui sont chal !

Renôd Di qwè ? Vos-v' moquez d'nos-ôtes sû'remint !

Mikaël Et c'èst po cisse couyonâde la qu'vos nos-av' fêt d'ner nos çances !!!

Angélique C'è-st-on conte a bouyote qui vos d'hez la ! rindez-nos nos brokes !

Gwendoline Dji-m' dotéve bin qu'vos n' sèpiz rin !

Ludivine Po dire dès s'fêtes insi vât mîs di s'tère !

Marika A l'tévé, qwand in-ome done radjoû a ine feume, ça finihe chaque fèye par ine grosse bâhe so lès lèpes !!! c'est tofér insi !!! Dj'a rèzon ! Na !

Angélique Mins nos n'èstans nin a l'tévé èt vos, vos n'estez qu'ine pitite glawène nin pus sutèye qu'i n'fât !

(Tot d'on côp, on-z-ètind ine musique di cirque - Po bin fé, ci sèrêut l'idéyâl d'aveûr l'êr dès gladiateûrs .)

Renôd Qu'èst-ce qui c'est qu'çoula ?

MikaëlIne muzique come à cirque !

Ludivine On n'a anonci nouk è viyèdje portant !

(Renôd èt Marika ont broké a l'fignèsse)

Renôd I n'a rin a l'ouhe !

MarikaOn n'veût rin !

Gwendoline Li muzique ni vint nin d'â-d' foû !...

Sinne 7. Gwendoline – Marika – Angélique – Ludivine – Renôd – Mikaël - Denis

Denis inteûre, so s'tièsse il a on blanc turban comme les-arâbes, il è-st-èwalpé d'vins ine grande neûre cape (si vos-av' eune – ôtrumint, fez a vosse manîre).

Gwendoline Av' avou in-ak'cidint ?

Angélique Av' mâ vosse tièsse ?

Renôd Bin ma frike, vos l'estez agad'lé !

Mikaël Salam' alèyi koum mon frère ! (i fêt l'salut come lès-arâbes)

Denis Boubiès qui v's-èstèz ! (prindant in-êr important)
Mèdames, Mècheûs ! Oûy, po l'prumîre fèye chal è viyèdje, vos-alez aveûr li plêzîr èt l'oneûr dè rèscontrer li grand, li fâmeûs ip'notizeûr Ravana Granri !

Marika Wice è-st-i ?

Denis Il èst chal divant vos ! divant vos-oûy !

Ludivine Wice don ?

Angélique I n'a nol indou chal !

Denis V's-èstèz vrèymint dès-èstènés dèl tonîre ! Il èst chal vis di-dje !

Gwendoline Ou dji d'vin brake ou dj'so luskète, mins, a pârt vos èt nos-ôtes, i n'a nolu chal è l'plèce !

Denis Ravana Granri (i marquèye on p'tit moumint d'vant dè continouwer a djâzer)
C'èst mi !

Renôd Vos ?...Ravana.... ?

- Denis Awè...Ravana li seûl ! l'unique ! li grand !...c'est mi !!!
- Mikaël Vos-av' candji d'nationalité qui vos-v' loumez insi ?
- Denis Nonna Moncheû qui n'kinohe rin...Ravana Granri c'est m'no d'sinne !
- Angélique Qu'est-ce qui c'est çoula po dès bièstrèyes ?
- Denis (Vèk'sé) Dès bièstrèyes !...Vos-alez vèyi si c'est dès bièstrèyes !
Et çouchal, (tot fîr) c'est m'costume di sinne ! Qu'ennè d'héz-v' ?
- Ludivine Di sinne ?
- Denis Awè ! d'ipnotizeûr !
- MarikaD'ipnotizeûr ? qu'est-ce qui c'est çoula ?
- Denis C'è-st-ine saqui qu'édwért lès djins rin qu'tot 'lzê r'loûkant d'
vins lès-oûy!
- Gwendoline Tot 'lzê r 'loukant d'vins lès-oûy ?
- Denis Awè ! Adonpwis èlzî fêt fé tot çou qu'i vout !
- Angélique Tot çou qu'i vout ?
- Denis S'i vout qui l'djin èdwèrmowe fasse li bådèt, i lî dit tot simplumint
(Denis prind 'ne grosse vwès) « Asteûre vos-èstèz-st-on bådèt !
magniz dès jèbes èt brèyez come lu !
- Renôd Et adon ?
- Denis Li djin pinse qu'elle è-st-on bådèt !
- MarikaElle a dès-grandès-orèyes ossu come divins Pinochio ?
- Denis** Nonna èdon !
- Ludivine C'est dès bwègnes contes çou qu'vos racontez la !

Gwendoline Awè !!! dès crakes ! nos n'vis crèyans nin!

Renôd Nonna ! I dit l'vrèye veûr ! Dj'a dèdja vèyou onk a l'télévûzion !
Il aveût lès-oûy qui lî brotchît foû dèl tièsse ! il arivéve minme
a èdwèrmi dès djins qui r'louki l'télévûzion !

Angélique Vos brâk'lez tos les deûs !

Denis Dji-v' djeûre qui nonna ! d'alieur dji-v' va fé 'ne démonstrâciyon !

MikaèlIne démonstrâciyon ?

Ludivine Sèriz-v' div'nou in « èdwèrmeû » par azârd ?

Denis Dj'a-st-ach'té on lîve qu'èsplike tot çou qu'i fât fé po rèussi ! dji
m'a èkzèrcé !

Angélique So qui ?

Denis So m'tchin !

Gwendoline Et ça a roté ?

Denis Dj'èl vou bin creûre ! A ponne l'aveû-dju r'loukî d'vins lès-oûy,
qu'i s'a-st-èdwèrmou !

Renôd Ci n'èst nin malâhèye avou lu ! c'n'èst nin po rin qu'on l'a batizé « Sot
dwèrmant ». I dwème tot l'long dè djoû !

Denis Insi, vos n'mi crèyez nin qwand dji-v' dit qui dji so capâbd'ipnotizer ? Dji-v'
zèl va prover !Dji va èdwèrmi onk di vos-ôtes ! Avou lisqué d'vos-ôtes fât-i
ataker ?

Gwendoline Edwèrmez mi p'tite soûr come çoula èle nos lèyerè è pâye !

MarikaDji n'vou nin dwèrmi ! dji n'a nin somèye !

Denis Elle èst trop djonne ! ça pôreût èsse dand'jreûs por lèye ! Dji va sayî so Angélique !

Angélique Nonna çoula !nin mi !...Ludivine convinreût mi ! Mi, dji so-st-ine véritâbe boule di gnérs, dismètant qu'lèye, èlle èst pus pâhûle ! Ci sèrè pus-âhèye avou lèye, èle s'èdwèm'rè mutwè pus rat'mint !

Ludivine Hèla ! hèla ! vos deûs !... Tot doûs ! Vos pôriz m'dimander mi-avis !
Pusqui vos l'av' dèdja vèyou fé Renôd èt bin, prustez-v' a l'èspériyince !

Renôd C'èst qui....

MikaèlHaha haha ! Il a sogne !

Renôd Sogne ? Mi ? Vos volez rire !

Denis Adon, vinez vochal. ! Mètez-v' divant mi ! Riloukiz-m' bin dreût d'vins les-oûy !
(Denis fèt dès grands-oûy).

Angélique O ! C'est qui m'freût apicî l'pèpète a fé dès-oûy insi !

MarikaDj'a sogne !

Gwendoline O !

Ludivine Signeûr !

Denis Vos lès bâcèles, tèhiz-v' sinon vos-alez tot fé rater !

(D'ine drole di vwès).

Renôd...vos sintez vos pâpîres qui div'nèt pèzantes!...fwért pèzantes !di pus' à pus pèzantes !... Vos v' sintez nâhi.... mwért nâhi ! !...nâhi !nâhi...Vos n'sâriz pus rëzister....vos pâpîres si sèrèt mâgré vos....Dwèrmez dj'èl vou ! asteûre vos dwèrmez ! Dwèrmez-v' ?

Renôd Awè...dji dwér !

Gwendoline Dwèrmez-v' po l'vrèye di vrèye Renôd?

Denis I n'vis rèspondrè nin ! c'èst mi qu'èst s'seûl mèsse ! I n'houtrè qu'mi !

Asteûre

Renôd , vos-èstèz ine poye....cwèrez dès viérs èt glouk'ser come si v's-aviz ponou !

(Renôd si mèt' a fé l'poye, a glouk'ser , a fé lès cwanses dè grèter a l'tére po trover dès viérs.)

Gwendoline Tututut' ! dji n'creû nin a cisse comèdèye la !

Ludivine Mi non pus ! Vos-v's -av' mètou èssonle po nos fé creûre âs mohes a deûs cous !

Angélique Awè tot djusse ! Si vos pinsez qui nos-alans roter è vosse djeû !

Marika (s'adressant a Renôd qu'è-st-an trin dè tourner âtou d'lèye)

Lèyiz-m' è pàye pitite pòyète ! alez cwèri vos viérs ôte pàrt !

Denis Insi, vos n'mi crèyez nin ?

Mikaèl Ni pô ni gote !...

Gwendoline On sèt bin qui Denis ou Renôd c'est Piron-Parèy !

Angélique Et qu'on bârbi rase l'ôte !

Ludivine Edwèrmez onk di nos-ôtes, mutwè qui....

Gwendoline Awè, mutwè qui....

Angélique Qu'on v'creûrè adon !

Denis D'akwèrd ! qui fât-i ip'notizer ?

Mikaèl Cisse fèye ci, ci sèrè ine bâcèle !

Ludivine Ine bâcèle ? À l'oneûr di qué Sint don ?

Gwendoline Poqwè nin vos ? âriz-v' sogne ossu téléfèye ?

Mikaël C'èst tot djusse ine quèsse d'équilibre !..on-z-a èdwèrmou Renôd, on valèt !
asteûre c'èst l'tour d'ine bâcèle !

Denis Il a rèzon !... alè, lisquéle di vos-ôtes fât-i èdwèrmi ? Vos Gwendoline ?

Gwendoline C'èst qui....

Mikaël Vos poliz bin v'moquez d'mi, vos n'av' nin l'êr pus corèdjeûse qu'i n'fât !

Denis Vos Angélique ?

Angélique Bin....Bin....

Marika(a Renôd qu'e-st-a costé d'lèye èt qui l'embête) Alez djower ôte pàrt poyète !

Ludivine Ni tchik'tans nin tant !..nos-alans sètchi â coûrt fistou po vèyî lisquéle
di nos treûs va s'pruster a l'èk'périyince !...Wice n-a-t-i dès-aloumètes
chal ?

Denis Là, so l'djivâ !

(Ludivine prind treûs-aloumètes.....so l' tins di tos lès pârlers, Renôd toûne âtou
d'Marika èt l'ambête...èlle èl kitchèsse co traze fèyes).

Gwendoline Côpez-lès bin, qu'on veûye li difèrince âhèyemint !

Ludivine Ci sèrè fèt d'vins lès rékes !

(Ele prézinte lès-aloumètes a Angélique èt a Ludivine)

MarikaMi ossu dji vou ine aloumète !

Gwendoline Vos-èstèz trop p'tite vos ! Alez djower avou vosse poye èt lèyiz nos è pâye !

Angélique Ni rat'nez nin l'pus longue por vos !

Ludivine Dji n'trik'tèye djamây dè mi !

Gwendoline Vola dj'a pris l'meune ossu !

Mikaël Qui èst-ce qu'a l'pus coûte ?

Ludivine C'èst mi !

Angélique Ouf ! - horèye !

Gwendoline Sâvèye ossu !

Ludivine Ay !ay !ay !

Denis Alans-i insi !!!

Ludivine Qui vasse parèt !

Denis Vos-alez fé come Renôd ! Plonkiz vos-oûy divins lès meunes !

Ludivine Come çouchal ?

Denis Awè...c'èst bin insi !...vos pâpîres div'nèt pèzantes....fwért pèzantes...di
pus
an pus pèzantes...vos n'sâriz pus m'rèzister...èle sont pèzantes.....

Ludivine pèzantes...pèzantes...vos-v' sintez nâhi...fwért nâhi.....mwért nâhi !...vos-
èstèz rindou ! Asteûre, vos cloyez vos pâpîres mâgré vos ! c'est vos qui va
dwèrmi ! ...dwèrmez vi di-dje !dj'èl vou !!!

Gwendoline Diâle marawe ! I dwème !

Angélique (passe lès mins d'avant les-oûy da Denis)...Denis...Hou-ou !

Mikaël Mins, c'est qui dwème po d'bon sav' !!...kimint av' fèt ?

Ludivine Bin, dji n'sé nin trop'...Dj'èl riloukîve come i m'l'aveût d'mandé ! Tot d'on
côp, dj'a sintou 'ne tcholeûr divins mès mins....adonpwis, come on courant
élèctrique qui m'passéve tot avâ l'wérip ! mi cervê zunéve come ine abalowe !

Lès mots v'nît mâgré mi ! dj'a dit tot çou qu'i faléve dire po-z-èdwèrmi
Denis...èt vola l'rèzultat

Gwendoline Vo 'nnè l'a-t-i ine maweûre !

Angélique Vos-v' la div'nowe ip'notizeûse ossu vos !

MikaèlFez-lî fé l'poye ossu !

MarikaNonna ! li gade ! lès poyes c'èst bin trop soyant !

Gwendoline Fez l'tronner come ine bikète !

Ludivine Alèz, Denis...vos-èstèz-st-ine gade....mostrez on pô come vos djâzez bin
come ine bikète !

Denis Bê....bê....bê !

Ludivine Asteûre, alez djower avou l'poye....

(Denis fêt l'gade...i souke Renôd... ci-chal court tot avâ l'sinne tot qu'cak'tant come ine
assotèye...lès-èfants si riyèt malåde)

Angélique C'est bin bê tot çoula, mins fâreût mutwè mîs èlzê dispièrter divant qu'ça n'
divègne trop dandj'reûs por zèls !

Gwendoline C'est vrèye ça ! On n'sé djamây çou qui pôreût ariver !

MikaèlVos-av' rêzon ! Vinez chal bikète !....Dispièrtez-v' Denis !

Denis Bê...bê....bê....

Ludivine Alez, asteûre , on n'dwèrt pus !

Denis Bê....bê....bê...

Angélique I n'si dispiète nin ?

MikaèlVos n'î arivez nin ?

- Ludivine Dji sâye...dji sâye....alez Denis, dji-v's-ordone di-v' dispièrter !....
- Denis Bê...bê....
- Gwendoline Ay lay lay !....
- Ludivine Signeûr ! Dji n'î parvin nin ! qwè fé ?
- Mikaèl Loukiz...la so l'tâfe...vola l'lîve da Denis ! « Manuel du parfait hypnotiseur ! »...i s'pout qu'il èst s'crit d'vins kimint qu'on deût fé !..
- Ludivine Espérans-l'...
- MikaèlLà...lihez Ludivine....
- (Ludivine lét reût-a-bale....)....
- Ludivine (fêt des droles di passe magnétiques âtou dèl tièsse da Denis)
Denis...vos n'estez pus ine bikète...dji va compter djuska treûs
èt vos-v' dispiètrez....onk...deûs....treûs !...dispièrtez-v', dj'èl vou !
- Denis (Denis qui s'dispiète). Vos vèyez èdon Ludivine come dji-v's-a bin èdwèrmou !
- Ludivine (tot riyant)... Bê...bê... awè mon bikèt ! bê awè !
- Denis Qui v'prind-t-i dè vos ? Poqwè m'loumez-v' vosse bikèt ?
- Angélique L'èk'périyince lî a mutwè d'rindjî l'cèrvê !
- Gwendoline Alez, mi bikèt, ...asteûre fâreût dispièrter Renôd ossu !
- Denis Mi bikèt ! mi bikèt !..èle piède sès djèyes va suremint ! On-z-a rèzon dè dîre qui lès bâcèles c'è-st-ine drole d'indjince !
- Ludivine Dispièrtez vosse poye divant qu'èle ni s'allowe lès pates a grawî âs vièrs !

- Denis Pî ! pî ! pî ! Vinez pitite poyète ! vinez chal ! dji compte djuska treûs èt hop',
vos rid'vinrez Renôd ! Onk ! deûs ! treûs !...vorchal Renôd.
- Renôd Et adon ? Qwand m'alez-v' èdwèrmi ? c'èst qu'dji rouwande sav' mi !Dji n'a
nin tote li djournèye divant mi !
- Ludivine El f'rè qwand lès poyes âront dès dints...èdon m'bikèt !
- Denis Av' bin vite fini di m'loumez insi ? vos m'prindez po ine gade suremint !
- Angélique On n'sét djamây Moncheû l'ip'notizeûr....
- Mikaël On fêt co bin l'gade sins l'saveûr !

FIN